



100 agn por mèda Nane



Svilup comunal

Te salf dles manifestaziuns d'Al Plan el gnü prejenté i pröms dac por le plan de svilup comunal, en cunt dla urbanistica y dla mobilità.



Raites nees

Le Comune á investí cotan por realisé raites nees y por garantí la sügherté sön les plazes dai jüc de nosc comune. Y proiec nös el ince dan man.



Löm por jí a pe

Jí a pé con sügherté ince da sèra. L'Aministraziun de Comune á en previjiun da iluminé deplü posc olache al é les strisciores da passé ia la strada.

Plan de svilup: i pröms dac

Ai 6 de messé el gnü prejenté te salf dles manifestaziuns d'Al Plan i pröms dac por le plan de svilup communal, sön i temesc dl'urbanistica y dla mobilité



Plan de svilup communal: dantan la serada de prejentaziun dai pröms dac sön urbanistica y mobilité.

Öna dles gran desfides por i Comuni é chëra da realisé le plan de svilup communal, en stromont de programaziun t'en tomp plü lunch, co é gnü istituí tres la lege urbanistica nea y co ciara ai aspec plü desvalis: ambient, urbanistica, turism, viabilité, mobilité ez. Sot al titul "**Le plan de svilup fajunse deboriada**", á le Comune envié la popolaziun ai 6 de messé te salf dles manifestaziuns d'Al Plan, por prejenté i pröms dac coüs adöm tai ciamps dl'urbanistica y dla mobilité. Le plan de svilup vën coordiné dal dr. inj. Winfried Moroder da Balsan/Gherdëna, co á damperfora splighé la funziun dal plan, olache ara nen vá dandadöt da mioré la cualité de vita tai comuni. Deboriada con Moroder el pa mësa ince i raprejentanc Markus Lobis y Hugo Götsch dla dita kyklos da Balsan, y Hans Peter Niederkofler dla dita Qnex da Balsan, co fistidiëia da arjigné le plan dla mobilité. Dantan la serada é en iade gnü prejenté dac y fat osservaziuns, zonza jí ete te provedimonc o soluziuns concretes. Cöstes gnará laorades fora damproia.

Con le plan de svilup mët i comuni

les bases por le svilup tal dagní y - desche Moroder á splighé - "dessel valëi almanco 20 agn", tan co cina dal 2043. I aturs tla realisaziun dal plan sòle post é sambën l'Ombolt desco pröm zitadin, co laora deboriada con la Junta, le Consëi y - dër emportant - con i zitadins enstësc, co é enviés da se porté ete ativamonter. Önn dai fins urbanistics prinzipai dal plan é chël da sparagné terac, endere: "Le plan n'á nia le fin da tigní sò le svilup, mo müdé le svilup", á dit Moroder te sòa introduziun, por passé spo ala prejentaziun de valgügn dac enteressanc sön nosc comune.

GEOGRAFIA Y POPOLAZIUN

Con 161,34 km², é Mareo le 10. comune plü gran de Südtirol. Le 68% dal teritore communal é te parch natural. La spersa abitada é dal 2002 cina al 2020 corsciüda dal 15,2%. Te Mareo viël dal 2022 chi 3.142 zitadins (messé): 1.847 a Al Plan, 852 a La Pli y 443 a Rina. La kyklos á ince analisé tan de jont co abitëia strada dô strada. T'Al Plan é le plü jont tla str. Catarina Lanz (301), tla str. Plan de Coronas (224) y tla str. Paracia (186). A La Pli vir

la maiú pert tla str. La Pli (203), tla str. Rara (116) y tla str. Furcia (104). A Rina án le plü jont do la str. Rina (126), spo vëgnel la str. Ciornadú (81) y la str. Costalungia (54). Con na eté mesana de 38,4 agn, alda Mareo pai 24 comuni de Südtirol con la popolaziun plü jona, respet ala media provinciala de 40,8 agn. Bën 534 porsones vá foradecá a laoré, deperpo che 231 vën te nosc comune a fá so mestier.

Danter les desfides urbanistiches dal dagní sarál da definí la delimitaziun dai raiuns abités, desco ince chëra abitativa, é jü ennant Moroder, con les unités abitative co gnará mëndres: da 2,6 porsones por unité abitativa, é preodü da roé te vint agn a 2,2 - al orará ester plü cuatiers. Le bojügn enrescí de cubatöra abitativa é de 92.180 m³ cina dal 2043, co foss za. 4,5 ha de spersa. Por ci co reverda i prisc dal abité, é Mareo sora la mesaria provinciala: pai prisc dles imobilies, dai terac y dai afic.

ECONOMIA

Por ci co reverda les strotöres economiches, édl 178 imprejes agricole (218 lüsc da paur), 71

firμες artejenales y comerciales con 273 colaboradësses y colaboradus (dac 2020). Le turism laora con 242 eserzizi y 4.752 lec turistics. Dal 2022 él gnü registré 661.957 pernotamonc, con na sojornanza mesana de 4,6 dis. Le turism é en gran pert conzentré a Al Plan, con la particularité che al é tres plü residence y tres plü strotöres dla categoria alta. Les secundes ciases ea dal 2021 avisa 211.

L'AUTO Á ARJUNT SÜ LIMÌ

I raprezentanc dla dita kyklos á fat plü riflessciuns en cunt dla mobilité. Te cösta pröma fasa nen vára en iade da analisé la situaziun. "La mobilité ne vën nia mosörada en km de tru, mo ara nen vá dai fins che le tru á", á dit Lobis, por osservé che cina ciamó é dōta la mobilité dër conzentrada sōn l'auto y che trep é gnü costruì en funziun dai auti. Desche an sá, é le trafich önn dai problems plü sontis da nosta jont. Sidi a Mantëna Todëscia, co a Longega y ta Pederöa él telecameres co cumpëda i mesi. Dalzes zifres vëigun che Al Plan tira alerch trep trafich. Tal tomp dai 12 de messé ai 29 de setëmber 2022 án odü che za. mec i auti cumpedés a Mantëna Todëscia rōa sō te Mareo. A Mantëna Todëscia án cumpedé etepert 368.852 mesi, a Longega 189.425 (51,46%). "Ara nen vá da sbürlé zoruch l'auto y adaté i trus ales atres formes de mobilité. I auti ne pōn sambën nia slü fora endlunch, mo desco zitadins pōn ieré che dūc ái sōa lerch", á dit Lobis.

Pa cōsta lerch alda sambën les rodes, olache la kyklos vëiga gran potenzial da Bornech ete por Sares. Sōn chë strada él ince da pert dla popolaziun le dejider da lascé pro ma le trafich motorisé de chi co abitéia enló. Por ci co reverda le jí a pe, á i esperc dla dita kyklos conscidré che t'Al Plan él en gran potenzial de trus da jí a pe, co messass gní laorés fora miú, por che ai sidi ince plü atratífs da tó (ej. revitalisé "les cōrtēs"). Trus da jí a pe messass ince gní laorés fora miú danter i paisc - p.ej. con en bel tru danter La Pli y Al Plan. Al momont vëigun de gran loces y precarietés. Desco ejompli él gnü porté dant le marciapīsc da Mantëna sō, la burcia zitia danter str. Catarina Lanz y



L'inj. Winfried Moroder, danter Hugo Götsch y Markus Lobis dla kyklos.

str. Plan de Corones (encër le Bar Rosalpina), la situaziun prigorosa da jí sō cuntra La Bronta, o i marciapīsc co mancia feter daldöt a Rina. "Por sciori y jont dal post mēssel ester la poscibilité da pié da ciasa demez a pe", é la convinziun dla kyklos.

NA BONA MOBILITÉ PUBLICA

Canche ara nen vá de alternatives al auto, á na gran funziun la mobilité publica; de chëra á baié Niederkofler dla dita Qnex, co á conscidré: "La mobilité publica te Mareo é gnüda svilupada dër bun tai ultimi agn", fajenn referimont al Mareo Bus, ala linia da Bornech cina ta Pederü (co vá sën döt l'ann, y vën potenziada dassënn d'isté), ala linia da d'isté ta Furcia, ala linia danter Longega y Rina. "Döt adöm vëgnel garantí en bun azes a döt le teritore communal; ara nen vá porchël de mioramonc cualitatífs". Tló jea le ponsier danda-döt a Longega, olache la fermada por Bornech y la Val Badia é te na ota sōn strada y olache al é dër encomper da baraté bus: dal punt cina fora dla Gaderform o enzoscü.

OSSERVAZIUNS DLA JONT

Ala fin dla serada á ince la jont podü dí la sōa. **Roman Erlacher** á porté dant le problem che les corieres ne ciaria nia les rodes y che le tru sōn la ex panoramica da Ognēs ete - co podess ester na alternativa - é saré jō da en privat. Ennant ál critiché la situaziun dles fermades dla coriera a Longega, belo anunziata

endant. **Ernesto Kastlunger** á fat l'osservaziun che al é gnü fat en grōm de plans tal passé y che al jess debojūgn da i mēter en pratica. So ponsier s'á spo conzentré sōn le raiun dles scores d'Al Plan. Referí s'ál en particular al magazinn dai stōdafūs y dal Aiūt Alpin, co é t'en zënter scolastich, y la orenté da fá sō la sonta nea dla Crusc Blancia endō amez paisc, pomez a na burcia, ci co rünass do sōa minunga en bel toch d'Al Plan. So apel: ponsé sora da fá en zënter de proteziun zivila fora dal paisc. **Olga Pedevilla** é jūda ete sōn i posc prigorusc tal paisc, olache ara s'á damané che al vëgni tut atira soluziuns transitores, deache an ne pó da ëra enfora nia aspeté cina che le prozes é slüt jō. Ennant ára osservé che i lifc é dër cers da anüzé, ince por les porsones dal post. **Luca Complojer** á envié da jí cōsc prozes con coraje, ci co se damana ince da tó dezijiuns nia populares y s'anfidé da dí de no.

Cōsc ea ince le tenor dla serada: avëi coraje da tó dezijiuns y jí trus nōs. Cōsta sëra é stada en prēm vare de enformaziun. "Chisc dac é emportanc por les dezijiuns y i provedimonc da tó tal dagni", á dit l'assessuria **Elisabeth Frenner**, co á envié la comunità da tó pert: "I sun tal mēter man y i adorun l'aiūt dai zitadins". Le gran laur gnará tai proscimi tomps y con le liam danter Aministrazion y comunità, podarán roé dūc deboriada a formulé propostas concretes por porté pro che an se stái ennant saorí da vire te nōsc comune y te nūsc paisc.

Tres da laur por strades y plazes

Deliberes dla Junta de Comune dai 13 de merz cina ai 12 de messé 2023

LAÛRS

STRADA TORNARÈCIA - SLOSSER: Le Comune á l'intenziun da ressané cösta strada y á porchêl enciaré le **stüde da injenier iPM da Bornech** da fá le proiet. L'onorar é de 6.542,50€ (contr. y IVA lapró)

STRADA CHÈS COSTES: La Junta á enciaré le **dr. inj. Maurizio Kastlunger** con stüde a Bornech con la proietaziun y la direziun dai laûrs de asfaltaziun y manutenziun straordinaria tla localitè "Chès Costes" a Al Plan. L'onorar dla enciaria é de 10.757,10€ (contr. y IVA lapró). Tla sontada dai 27.03.2023 él spo gnü aproé le proiet esecutif, co prevèiga na soma de 252.618,57€ partida sö ensciö: 210.947,60€ de laurs sön basa de lizita y 41.670,87€ de somes a desposiziun dl'Aministrasiun.

SALF DLA MUSIGA - LA PLI: La firma **Nagà Srl d'La Val** á cialfé l'enciaria da fá y condü tlès, por la soma de 506,20€ plü IVA.

CONDÜTA FRAMACIA - MORIN - LA PLI: Ai 13 d'aorí á la Junta aproé la pröma pert dai laurs fac **dla firma Erlacher Markus d'Al Plan**, y á aproé da ti paié fora 137.683,06€ plü IVA. Tla sontada dai 02.05.2023 él gnü aproé por i laurs dla medema firma cosc emplü de 7.600,00€ plü IVA al 10%. Tla sontada dai 07.06.2023 á la Junta sorantut l'impègn de spèisa de 71.766,50€ (contr. y IVA lapró) por la proietaziun definitiva y esecutiva – co ti ea gnüda sorandada al **dr. inj. Maurizio Kastlunger** d'Al Plan.

MENSA SCORA D'AL PLAN: Al stüde da **injenier Griplan da Bornech** ti él gnü paié fora la soma de 31.720,00€ (contr. y IVA lapró) desco onorar por la proietaziun y la direziun dai laurs de ampliament dla mensa.

STRADA SORÖA: Les rogossies dai 5 d'agost 2022 á gaujë plü danns

sön strades comunales, ensciö ince sön la strada Soröa, olache al ó ester laurs por garantí la stabilitè dla strada. Ensciö él gnü enciaré le stüde da **injenier iPM da Bornech** da fá en proiet, por l'onorar de 21.021,73€ (contr. y IVA lapró). Le proiet esecutif prevèiga la soma de 469.187,31€, partis sö danter 355.000,00€ de laurs sön basa de lizita y 114.187,31€ de somes a desposiziun dl'Aministrasiun.

ILUMINAZIUN PUBBLICA: Tres le plann statal PNRR, plü avisa tal proiet co reverda intervenc por l'efiziënza energetica tai comuni, ti á la Junta sorandé döes enciaries ala **MEPing Srl d'Al Plan** da laoré fora en proiet de mascima y en proiet

esecutif por renové l'iluminaziun publica tal comune, desco ince la documentaziun por scrí fora i laurs y l'enciaria dla direziun dai laurs y la contabilitè. L'onorar é de 6.965,50€ plü IVA y contribuc por le proiet dal 2023 y ciamó en iade la medema soma por le proiet 2024.

FIRA OTICA RINA Y LA PLI: Tla sontada dai 07.06.2023 á la Junta aproé la terza pert dai laûrs fac dla **firma Alpenbau da Terenten** y fat fora da ti licuidé la soma de 175.564,70€ plü IVA.

RESSANAMONT CIASA DAL SPORT D'AL PLAN: Tla sontada dai 15.05.2023 á la Junta aproé en proiet de variante, co prevèiga cosc

LA PLI - EN TESUR DA DESCORÍ POSCIBILITÉ DE CONTRIBUC POR PROIEC Y INIZIATIVES PRIVATES

Por le proiet "**La Pli - en tesur da descóri**", á le Comune abiné adalerch en contribut de 1,6 miliuns de euro fora dal fond statal PNRR. La medema soma á ince cialfé le Comune da Schnals por en so proiet. Dlungia chisc scioldi, él preodü por i dui comuni ciamó en contribut de 2.178.198,43€, destinés a dices y firmes (con sonta tai dui comuni) co mët a jí iniziative por animé l'ativité y la vita culturala, sozuala y economica por i paisc, te nosc cajo La Pli. Ara nen vá de proiec tal ciamp cultural, creatif, turistic, comercial, artejanel o dl'agricoltöra, co á le fin da sostegní l'economia locala y valorisé sü produc, i förtli y les carateristiches dal teritore, desco ince por la promozion dla sostenibilitè. I proiec **pó gní prejentés cina ai 11 de setëmber 2023 ales 18:00** sön le portal aposta, y chisc gnará valütés tres le Ministêr dla Cultura. I proiec prejentês pó roé a na valüta da 75.000,00€ cina en mascimo de

150.000,00€ (vigne dita, pó prejenté cina 3 proiec de 150 mile euro l'önn), y gnará sostegnisc con en contribut a fond pordü de alplü 75 mile euro. De regola vën i proiec sostegnisc cina al 90% dai cosc motüs dant; al 100% vën sostegnisc proiec co prevèiga la istituziun de na impreja nea o por imprejes menades tla maiü pert da jogn y/o ères. Con le contribut vègnel sostegní danter l'ater emplanc, mascinn, aredamonc, hardware y software, lizonzes, zertificaziuns liades al proiet, strotöres o laurs de mür (cina al 40% dles spèises totales), amministrasiun y sorvisc. Almanco le 50% dai investimonc mëss gní destiné a mosöres co dá en contribut por combate o alisiré les müdaziuns climatices. **Le proiet á spo da gní realisé anter 18 mëns dal'aproaziun y nia plü tert co i 31 de dezëmber 2025.** La consulënza por i proiec vën fata tres la firma ForTeam da Balsan, co é partner dal proiet (ciara a plata 7). Enformesse te Comune sön co che al é da fá.



Sõla strada cuntra le Hotel Emma é gnü comedé le marciapiasc.

emplü de 47.724,82€ plü IVA al 10%. La firma **Electro Ploner d'La Pli** é gnüda enciariada por arjigné endò les lignes dal strom, por la soma de 5.300,00€ plü IVA.

CANALISAZIUN y FIRA OTICA "ALFARÈI - COLAC": Tla sontada dai 7 de jügn á la Junta aproé la secunda pert dai laürs fac dla firma Verginer Bau Srl & Co. Sas da San Martin, y á aproé da ti paié fora la soma de 61.691,37€ (IVA lapró).

PROIET PNRR "LA PLI - EN TESUR DA DESCORÍ": Desche i án belo scrit, á le Comune de Mareo podü pié dô en contribut de 1,6 miliuns de euro fora dal PNRR, por le capitul destiné ala "Attrattività dei borghi storici". La Junta á sên dé ia les prömes enciaries:

- Le stüde dal **arch. Zanella Adriano da Sterzing** é gnü enciarié da fá le proiet por la sistemaziun dla plaza d'La Pli. L'onorar é de 22.543,61€ (contr. y IVA lapró).

- La firma **Connected Reality Srl** é gnüda enciariada con le sorvisc software y da arjigné la mapa grafica y interativa dla contrada (Roda dles Viles), por 80.000,00€ plü IVA.

- La firma **ForTeam da Balsan** á ciafé la enciaria por l'acompagnamont y la consulénza da mèter sò la cooperativa de comunité y l'ativaziun dal zënter cultural y de formaziun. L'onorar é de 110.475,41€ plü IVA.



Laür por renforzé la strada Val dai Tamersc co á dé do, defata do tlea da Ciamaor.

- Le **dr. inj. Paul Rovara dal stüde tecnich Plancenter da Sterzing** á ciafé l'enciaria por le control tecnich dal proiet de sistemaziun dla plaza, por en onorar de 1.689,80€ (contr. y IVA lapró).

PNRR - "DIGITALISAZIUN DL'AMINISTRAZIUN PUBLICA"

Le Comune de Mareo á tut pert a deplü proiec y apalc tres le PNRR - le Plann Nazional de Ripreja y Resiliénza. Döt adöm se tratera de proiec co reverda la digitalisaziun dl'aministrazion publica, por otimisé le sorvisc y ince ti alesiré l'azes ai zitadins. Ennant é ince la orenté da tó pert a apalc por proiec de sconanza dal teritore y dal'ega, intervonc por efiziénza energetica, desco ince proiec por l'atrativité dai paisc. Por podèi tó pert, vál debojügn da nominé le RUP, co é le "Responsabl Unich dal Prozedimont". Tla sontada de Junta dai 20.03.2023 é gnü fat fora da i dé còsta enciaria ala Secreteria de Comune dra. Verena Ellecosta.

Tla sontada dai 07.06.2023 i é gnü dé al **Consorz dai Comuni da Balsan** la enciaria por le sorvisc de integrazion dla plataforma de paiamonc PagoPA, por en onorar de 1.500,00€ plü IVA.

La firma **Innovation Consulting Srl da Andrian** á ciafé na enciaria de 7.000,00€ plü IVA por la realisaziun de na plataforma digitala por la notificaziun dles entrades

patrimoniales, desco ince na enciaria de 65.500,00€ plü IVA por mioré la digitalisaziun dai sorvisc dl'Aministrazion publica.

ENCIARIES

Ingegneria e Sicurezza Srl - Balsan: 1.018,00€ plü IVA por le control periodich y straordinar dai lifc (ascensurs) tai frabicac comunai - agn 2023/24.

Taubau Srl - Vandoies: 12.836,87€ por cuncé marciapisc a Al Plan.

Euroform K. Winkler Srl - Türesc: 15.287,00€ plü IVA por condü y mèter sò jüc nös sön les plazes dai jüc tal comune de Mareo.

Hammann Srl - Annweiler am Trifels (D): 14.120,00 plü IVA por puzené fora i ros dal'ega da bëre tla localitè "Prades".

Kofler & Rech Spa - Valdaora: 11.400,00€ plü IVA por scoé les strades comunales cola mascinn da scoé.

Giovacchini Società Cooperativa - Balsan: 620,00€ plü IVA por l'ajornamont sön la ora da stemplé (de control) te ciasa de Comune.

Ladiniaservice Sas - San Martin de Tor: 1.600,00€ plü IVA por laurs



A Rina, vis a vis dal Bar Rosa, él gnü motü sö en speedcheck con le limo de 30 al'ora. Cösc é en post olache la strada vën plü stronta y olache trec ciafers vá gonot y ienn massa debota. (Foto: Gertrud Ellecosta)

da puzené tla scolina d'Al Plan, dai 27 de merz ai 6 d'aorí 2023; 7.300,00€ plü IVA por puzené ennant cina ai 20 de jügn 2023.

Firma Pallua Armando - La Pli: 215,00€ plü IVA por ciaé y slü na fossa a Al Plan.

Garten-Baumschule Obojes - Valdaora: 6.466,00€ por agaié lëns a Al Plan.

Kofler & Rech Spa - Valdaora: max. 10.000,00€ por condü asfalt da cuncé fora büsc sön les strades de comune.

Stadtwerke - Bornech: 659,00€ plü IVA por taché ete le salf dai jogn y la scolina d'La Pli ala fira otica.

Geom. Helmuth Palfrader - Al Plan: 2.177,70€ por laoré fora le plann de partiziun por le raiun d'espansiun y le raiun turistic "Roncac".

Firma Erlacher Markus - Al Plan: 36.534,74€ plü IVA por realisé en mür de sostèn tal raiun d'espansiun "Gran Pré".

Geom. Helmuth Palfrader - Al Plan: 4.483,50€ por mosöraziuns tal raiun artejanel "Ciamaor".

Firma Vieider Reinhard & Co. Srl - Blumau: 10.573,00€ plü IVA por condü pilastri de metal.

Kofler & Rech Spa - Valdaora: 18.181,66€ por asfalté la plaza da parché publica danter Hotel Corona y bocá; 8.468,02€ por asfalté la plaza publica dan Ciasa de Vijinanza; 26.379,45€ por fá asfalt sön la str. Rina; 34.980,45€ + 115.849,37€ por fá asfalt sön la strada Val dai Tamersc; 48.194,88€ por fá asfalt sön la strada La Pli. I prisc é con IVA lapró.

RDK Edil Service de Daporta Reinhold - Longiarü: 737,00€ plü IVA por baraté fora peres sön l'ur dla strada Senes a Al Plan.

Arch. Christian Agreiter - Al Plan: enciaria por la proietaziun dai planns por tó demez les barieres architetonicas tai comuni, aladô dal decret dal Presidënt dal Consëi dai Ministri dai 10 d'otobor 2022. Ara nen vá de endôt 15 frabiches,

olache la enciaria é de 33.000,00€ plü contr. y IVA.

Sign. Andreas Sottsas - Rina: 4.000,00€ por de pici laurs de manutenziun sön la strada Rina - Pecëi - Tintal.

Segnaletica Stradale C. M. Ladina Srl - Vich de Fascia: 15.000,00€ (IVA lapró) por deponje la marcaziun sön strades y plazes dal comune de Mareo.

ZP Srl - Al Plan: 1.821,00€ plü IVA por laurs de manutenziun sön la plaza dla scora mesana dan palestra. Ara nen vá da baraté fora les perts de lën pal anfiteater olache an pó se sonté.

Firma Obojes Markus - Valdaora: 1.372,80€ (IVA lapró) por scorzes da mëter jö tles plazes dai jüc dal comune de Mareo.

Firma Kreateam Snc - Ratschings: döes enciaries - de 8.632,72€ (IVA lapró) y 4.654,30€ por arjigné y condü möbli por la Ciasa dai pici d'Al Plan.

Rio tomp: Do che le rio tomp de ma 2023 á gaujé roes y rotes söles strades tles localités "Col" a Al Plan, "Frena" a La Pli y "Grones" a Rina, á la Junta enciarié le **stüde Sulzenbacher & Partner da Bornech** da fá soraposcé geologics, por en onorar de 1.603,20€ (contr. y IVA lapró).

Dipdruck Snc - Bornech: 398,00€ plü IVA por stampé les zetoles d'ingres al parch natural por le daz co vën trat ete ta Fodara Masarönn.

Selmani Srl - Valsperch: 2.257,00€ (IVA lapró) por condü giara por la cortina d'Al Plan.

Ekos Srl - Vahrn: 383,70€ (IVA lapró) por puzené fora le pozet pal magazinn dai Stödafüs d'Al Plan.

Chiocchetti Luigi Srl - Moena: 4.200,00€ (IVA lapró) por jütades emplü dal refodam bio, dantan l'isté 2023.

Niederwieser Bau Srl - Türesc: 12.634,55€ (IVA lapró) por laurs da

ciaé y trasport de material por les strades comunales.

Sign. Pablo Palfrader - Al Plan: 5.000,00€ brutto (plü INPS y IRAP de competonza) por la redaziun dla "Cronica dal Comune de Mareo 2022".

Firma Dipdruck Ohg - Bornech: 520,00€ plü IVA por la stampa dla "Cronica dal Comune de Mareo 2022".

Schrottenhof de Kosta Eduard - San Laronz: 13.900,00€ plü IVA por condü üs por les refeziuns de scora te nosc comune, tla perioda dai 01.07.2023 ai 30.06.2025.

Firma Erlacher Markus - Al Plan: 13.304,00€ plü IVA por en intervont de prescia sön la strada danter Ciamaor y Lé dla Crëda, olache la strada manaciâ da dé do.

Feichter Oskar - La Pli: 4.477,40€ por arjigné möbli por la scolina da Rina.

Termotecnica Kastlunger - Al Plan: 26.543,61€ plü IVA por

intervonc sön la condüta dal'ega a Framacia y Longega.

Pedacta Objekt Srl - Lana: 1.805,60€ (IVA lapró) por condü material por la scora elementara da Rina.

Stüde Verginer SEVE Srl - Badia: 861,00€ + IVA por trasmisciun de documonc ala Agenzia delle Entrate.

Verginer Martino Sas - San Martin de Tor: 5.406,14€ plü IVA por laurs pl'iluminaziun publica, pomez ala pompa dal penzinn Q8.

Electro Ploner - La Pli: 1.200,00€ plü IVA por baraté fora les patrís pal emplant a sorëdl dla ciasa dal daz ta Fodara Masarönn.

Firma Obojes Hubert - Al Plan: 9.960,00€ plü IVA por laurs de ressanamont d'en mür pal ciamp dal sport d'Al Plan.

Stüde technich dr. Johann Wild - Vahrn: 1.015,54€ (contr. y IVA lapró) por sciazé l'espropriaziun dla pdt 3346/198 tal CC de Mareo (Roncac).

Firma Schneider Snc - Frangart: 855,00€ plü IVA por condü scagns por la scora elementara d'La Pli.

Archimedes Snc - Mühlbach: 1.499,38€ (IVA lapró) por condü en armé por enjins sportifs, por la scora elementara d'La Pli.

AL VËN PAIÉ FORA CUNC

93,10€ ala dra. Frenner Sylvia y 101,22€ al dr. Eduard Winkler desco spëises che ai é stés ete tla comisciun de valütaziun por le concurs da tó sò en funzionar technich.

14.743,70€ (IVA lapró) al Consorz dai Comuni dla Provinzia de Balsan, desco contribut anual 2023.

1.200,00€ plü IVA ala firma Gasser Othmar da Rina por laurs de manutenziun sòla strada da Grones.

629,03€ al Comune de Badia desco compartezpaziun ales spëises por en scolare co á frecuenté la scora mesana d'La Ila tal ann 2022.



Eniann da d'aisciöda él gnü asfalté y fat marcaziuns nees y plü tleres sòla plaza publica dan scolina, Ama Stay y Ciasa de Vijinanza, y sön la plaza publica danter Bocá y Cone.

3.000,00€ **ala Universitè Lèdia de Balsan**, por la professòra convenzionada tla Facoltè de Management dal Turism, dal Sport y dai Evènc a Bornech.

1.156,59€ **ala firma Verdorfer Reinigungsbedarf da Maran** por patùc da puzené tles scores, scolines y scora de musiga dal comune de Mareo.

1.393,72€ **ala Scora de Musiga da Bornech** desco compartezipaziun ales spèises por jones y jogn co frequentèia la scora dlàfora.

45.238,50€ **ala Comunità Comprensoriala Val de Puster** desco rata a saldo 2022 y 1. y 2. rata 2023 por i sorvisc ambientai y le sorvisc de assistonza a ciasa.

Sorvisc da desparé por la sajun da d'invern 2022/23: Al é gnü paié fora deplü cunc por le sorvisc: **ala firma Erich Palfrader** endöt 33.265,00€ plü IVA; **al sign. Luca Promberger** 23.500,00€ plü IVA y **al sign. Heini Crazzolara** 12.500,00€ plü IVA.

1.419,86€ **al Comune da Bornech** desco compartezipaziun ales spèises de gestiun dles scores d'oblianza - ann 2022, ai cosc d'investiziun dla scora mesana taliana - ann 2022 y al fond de rotaziun dla scora mesana taliana - ann 2023.

AMINISTRAZIUN

Tla sontada dai 13.03.2023 á la Junta aproé **na müdaziun de prescia al bilanz de previjiun 2023**, co munta sö a 166.181,00€. Ples entrades ciafunse 77.716,00€ de scioldi co é gnüs dal PNRR por proiec sön le svilup digital dl'aministrazion publica; 88.465,00€ é gnüs ete por la vonüda de terac por le frabiché alesiré tal raiun d'espansciun "Rü". Les medemes somes ciafun spo ince ples spèises, destinades ai proiec soradic y al terac alesiré.

Tla sontada dai 27.03.2023 á la junta aproé la **classificaziun dles unités abitative 2022, por cuatiers de jont da foradecá**, olache al é da paié la culta de sojornanza. Tla lista



Le Comune y le Consorz dal'Ega d'Al Plan laora tres ennant por ciafé na conzesciun da pié sö ega ete dles Fontanes da Lé dla Crèda. Tló é sté na encuntada te salf de Consèi. T'amez l'injenier Walter Ferdigg, co á fat le proiet. Les poscibilités da ciafé la conzesciun é dër bones.

él endöt 19 unités abitative - 18 a Al Plan y 1 a Rina. Pa 16 cuatiers él patrums dla Talia (1 dla prov. de Balsan), 1 en patrùn vèn dla Spagna, 1 dla Germania y 1 dal'Australia.

La Junta á aproé da slü jö **en contrat "pay per page" (paia por plata) con la firma Amonn office itcompetence center**, desco ince i sorandé la manutenziun. Le contrat val 5 agn y prevèiga na soma anuala de 9.296,40€. Por le 2023 él 6.972,30€, deache le contrat é empormó pié ia ai 1. d'aurí.

La Junta á fat fora da ti dé **al Comune d'La Val l'autorisaziun da anüzé 1 en post tla Ciasa dai Pici d'Al Plan**, dai 1. d'aurí cina ai 31 d'agost 2023. Le Comune d'La Val messará spo compartezipé ales spèises tla mosöra preodüda.

Le Tribunal Superiur dles Eghes Publiches á sciüré zoruch le recurs prejenté dai Stadtwerke da Bornech y dai comuni de Mareo y San Laronz en cunt de na conzesciun refodada por en berch dal strom sön la Gadera. Sön cösta él gnü fat fora da **prejenté en recurs cuntra la sentonza** y da enciarié i avocac Christof Baumgartner da Bornech y Andrea Manzi da Roma da defène les rajuns dal Comune.

Ai 03.04.2023 ti él gnü assegné **ai sign.s Clara Isabel y Abascià Antonio la proprieté** dla pdt 2658/14 tal CC de Mareo con na spersa de 261 m², tal raiun d'espansciun "Gran Pré". Lassora podarái frabiché na ciasa popolará con na cubatöra mascima de 593,11 m³. Ai á belo paié ete 39.222,42€ por le terac.

Tla sontada dai 08.05.2023 á la Junta fa fora **da i vène ala sign. ra Rindler Lucia** d'La Pli 44 m² dla pdt 399/8 tla P.T. 1000/II tal CC de Mareo. La parzela é tla strada La Pli.

Tla sontada dai 08.05.2023 á la Junta aproé le **sböz dal contrat de barat danter Comune de Mareo y Sozieté dai Lifc d'Al Plan** por la cumpra dai locai por i ambulatori sön la pdf 1884 tal CC de Mareo. Le contrat é gnü firmé ai 25 de messé y la soma otala che le Comune paia é de 617.775,43€ plü IVA, co gnará paiés anter trèi rates.

Tla sontada dai 08.05.2023 á la Junta fat fora da **tó pert al teritore "Leader Val de Puster" y ala strategia de svilup local**, por la perioda de finanziamont 2023 - 2027. Tres le program europeich "Leader" él tla perioda 2014 - 2022 roé deplü contribuc tal comune de Mareo, desco i 168 mile euro por le

ressanamont dla ciasa dal sport d'Al Plan o ince i 171 mile euro por la realisaziun dal parch dles ciuites ta Ciamao.

Tla sontada dai 08.05.2023 él gnü **aproé la gradatöra provisorä y ai 15.05. la gradatöra definitiva** por l'assegnaziun de terac alesiré tal raiun d'espansciun Rina I y Rina II. Al é en damanadü su, **le sign. Fischnaller Daniel** da Rina.

Belo dal 2007 ä le Comune slüt jö en contrat de afit de terac con le sign. Trebo Antonio, por podëi arjigné na baraca dal ciomont sö Furcia. Šén vál debojügn da **afité na maiü spersa**, porchél ä la Junta ai 08.05.2023 aproé da slü jö le contrat danö por en toch de terac de 150 m² dla pdt 1028/56. Le fit é de 1.000,00€ al ann.

La Junta ä fat fora da ti dé al **Comune da Bornech l'autorisaziun da anüzé 1 en post tla Ciasa dai Pici** d'Al Plan, dai 1. de jügn cina ai 8 d'otöber 2023. Le Comune da Bornech messará spo compartezipé ales spëises tla mosöra preodüda.

Tla sontada dai 15.06.2023 ä la Junta aproé **na müdaziun de prescia al bilanz de previjiun 2023**, co s'avaliëia sön la soma de 96.040,00€. Ples entrades él dandadöt 50.000,00€ co é gnüs ete dal PNRR por laürs da aumenté l'efiziënza energetica (co vá spo ince forapert por le medemo fin); 11.062,00€ é gnüs ete da fic atifs, 10.000,00€ é entrades dla cortina d'Al Plan, 6.844,00€ él gnü de contribut dla Provinzia por corí les spëises dl'energia, 15.000,00€ él gnü ete da straufunghes y sanzions. Ples spëises él danter l'ater y dlungia chères dal'efiziënza energetica ciamó 23.000,00€ por forza elettrica, 8.906,00€ por laurs da puzené te scolina, 5.000,00€ tal capitul dla polizia locala (assunziun secunda verda a tomp), 11.177,40€ por möblaria te scolines y Ciasa dai Pici. 37.000,00€ é gnüs tuc fora dal capitul por le plan de svilüp y motüs ete por le ressanamont d'en tru te paisc a Rina.

Tla sontada dai 15.06.2023 ä la Junta **slüt jö con la firma Sicos**

Srl da Predaia (TN) en contrat de manutenziun por le videocontrol. Le cost por le 2023 é: 1.250,00€ plü IVA por le videocontrol dal zënter de reziclaje y 1.250,00€ plü IVA por le videocontrol dal zënter dles scores d'Al Plan.

Tla sontada dai 15.06.2023 ä la Junta **nominé le stüde dal av. Paolo Recla da Milan desco consulënt legal** por ci co reverda l'anticoruziun, la trasparënza y l'azes ai zitadins. La nominaziun val dal 2023 al 2025, con en onorar de 2.537,60€ (contr. y IVA lapró) al ann.

Tla sontada dai 05.07.2023 él gnü **aproé le sböz dal documont unich de programaziun 2024 - 2026.**

URBANISTICA

Müdaziun al plann normatif dal raiun d'espansciun "C5 - Roncac", löt dal frabiché alesiré "G" - 1. provedimont 20.03.2023, 2. provedimont 02.05.2023

Sön domanda dai sign.s Bruno y

Brisilda Lamce, desco ince Rosa Mutschlechner y Ivan Mussner, ä la Junta aproé na müdaziun al plann normatif dal raiun d'espansciun "C5 - Roncac" a Al Plan, por le löt "G" dal frabiché alesiré, sön la pdt 3346/194 tal CC de Mareo. Deache le Decret dal Presidënt dla Provinzia nr. 4 dai 07.02.2022 vëiga danfora che l'anüzada de vigne bonus cubatöra te raiuns con plann d'atuaziun mëssi gní porté ete tal plann normatif, vëgnel enjunté ales normes d'atuaziun cösc test - co é gnü proponü dal Consorzi dai Comuni: *"Art. 10: L'anüzada dai bonus energia aladö dal Decret dal Presidënt dla Provinzia nr. 16 dai 20 d'auri 2020 y müdaziuns dedö, vën conzedü por la pert dal raiun segnada con le löt alesiré "G" tignenn cunt dles prescriziuns dal plann normatif."*

Sön domanda dal sign. Trebo Carlo, ä la Junta conzedü **na desviaziun ala destanza legala** danter la pdt 3037/43 tal CC de Mareo (söla strada Senes), por podëi realisé na stiga deforassö pla ciasa d'abitaziun,



Rendering con proposta dal raiun nö M1 y la strada d'azes, fora dla documentaziun dal arch. Emanuel Kostner da Corvara.

sön la pdf 648 tal CC de Mareo. Al é gnü concedü da tigní la destanza de 3,81 cm dal tretuar.

Müdaziun al plann communal por le teritore y la contrada, con trasformaziun de raiun de vërt agricul te raiun moscedé M1, sön la pdt 2826/36 tal CC de Mareo:

I sign.s Mutschlechner Georg - GM Plan, Karin Gabrielli, Mutschlechner Lukas, Obojes Maria y Obojes Felix á fat domanda da trasformé da vërt agricul te raiun moscedé M1 800 m² dla parzela 2826/36 y mëter lassora en indesc de frabricaziun de 2,20 m³/m², co ess pormetü da realisé lassora na cubatöra de 1.760 m³. Lapró èl gnü damané da porté ete na strada comunala de sort "D" sön la pdt 2826/1. (Le raiun y la strada é tal pre danter str. Ciasé y str. Catarina Lanz - ciara foto a plata 9).

La comisciun comunala por le teritore y la contrada á dé arat positif, scrienn dant che l'indesc de frabricaziun pó ester al plü de 1,9 m³/m² - tan co na cubatöra de 1.520 m³.

Y cösta é ince la proposta che la Junta á aproé. Por la trasformaziun mëss i damanadus i paié al Comune le 30% dal valor sciazé. La sciazada é gnüda fata dal **Laboratorio della stimageom. Dieter Oberarzbacher**, co róa sön en valor de 532,00€ al m². La soma da paié por i 800 m² é porchèl de 127.680,00€ (le 30% de 425.600,00€). Al n'é nia gnü azeté da porté ete l'azes desco strada comunala de sort "D". Al messará gní porté ete desco strada privata y realisé dai damanadus.

Müdaziun al plann d'atuaziun por le raiun d'espansciun C3 "Rina I y Rina II" - 1. provedimont ai 30.05.2023

La firma **Ferdigg Florino & C. Sas da Rina** á damané da podèi realisé na plaza da parché publica dan l'entrada dai dui raiuns. Ara nen vá de na spersa de 172 m² (147 m² é dal damanadú, 25 m² é de Comune). Con la müdaziun podessel gní fat 11 posc da parché publics emplü. Porchèl gness spo i posc publics tai raiuns portès ete desco posc privac.

La plaza gness realisada dal privat y ti gness spo dada jö debann al Comune. La Junta á aproé.

PERSONAL

Suplënzes: La sign.ra **Pedevilla Teresa** é gnüda tuta sò dai 13 ai 16 de merz y ai 29 y 30 de merz 2023 desco sorvidèssa te scolina d'La Pli, con orar a tomp parzial (40%), dai 12 d'aurí ai 21 de jügn 2023 desco sorvidèssa te scolina d'Al Plan, con orar a tomp plén.

Le sign. Walter Weiss é gnü enciarié da jí a lí jö les ores dal'ega por l'ann 2022/23, por en paiamont de 12,00€ neti al'ora plü spëises de iade.

Con delibera nr. 484/2022 á la Junta scrit fora **en concurs por titui y proes por tó sò en/na assistont/a aministratif/va a tla VI. c.f.** a tomp parzial y indeterminé. La comisciun é stada motüda adöm dala secreteria de Comune dra. Verena Ellecosta y dai colaboradus de

Defibriladus pó salvé vites

Le Comune de Mareo, en colaboraziun con la Crusc Blanca, á lascé mëter sò 4 defibriladus te nüsc païsc. Cater iadi ésaí gnüs tuc ca l'ann passé

Belo l'ann passé á l'Aministraziun de Comune, en colaboraziun con la Crusc Blanca Mareo, arjigné corones con defibriladus semi-automatics. Sën é düc i aparac en funziun y é a disposiziun sce al ess da jí debojügn. I defibriladus é gnüs motüs sò tal zënter d'Al Plan sot la caserm dai Carabinieri, sò Rina dan salf dles manifestaziuns y a La Pli pormez ala Ciasa dles Uniuns. Lapró n'án ince lascé mëter sò önn dlungia l'info-point ta Pederü, desco post olache al róa adöm en gröm de porsones. Lapró n'á le Skirama Plan de Coronas lascé mëter sò ta Furcia, sön Plan de Coronas dlungia la ciampaña y da pert dai pustri. I defibriladus pó salvé vites. Chèl án odü propio sön Plan de Coronas, canche l'aparac é gnü tut ca con suzes. Rodunt porchèl á ince l'Aministraziun de Comune albü la orenté y odü le debojügn da nen mëter a disposiziun te nüsc païsc.



Dan le defibriladú, tal zënter d'Al Plan. Da man dërta é l'Ombolt Felix Ploner, l'assessur Paul Pisching, Michael Call dai Stödafüs d'Al Plan, Sofia Castlunger y Sabine Falk dla Crusc Blanca Mareo.

UNIUN/ASSOZIAZIUN	CONTRIBUT	MOTIVAZIUN
Scora mesana Al Plan	5.335,00€	Ativité didatica por 97 scolari (55,00€ a scolare)
Scores elementares dal comune de Mareo	10.175,00€	Ativité didatica por 185 scolari (55,00€a scolare)
Scora mesana La Ila	55,00€	Ativité didatica - 1 en scolare
Scora mesana Ursulines - Bornech	55,00€	Ativité didatica - 1 en scolare
Scora mesana „Oswald v. Wolkenstein“ - Porsenú	55,00€	Ativité didatica - 1 en scolare
Consèi de Formaziun d'Al Plan	2.181,86€	Contribut 2023
Consèi de Formaziun da Rina	1.030,00€	Contribut 2023
Ploania de „Santa Maria dal Bun Consèi“ d'La Pli	13.000,00€	Contribut straordinar por comedé la gran ciampana y por laurs pla dlizia da Pliscia
Stödafüs d'Al Plan	50.000,00€	Contribut por cumpré le tanch nò - 2. rata
Al Plan Events	20.000,00€	Por corí en pert les spèises dla Copa dal Monn
Grup dai Jogn SKJ Al Plan	300,00€	Contribut 2023
Grup dai Jogn SKJ La Pli	300,00€	Contribut 2023
Stödafüs d'La Pli	9.000,00€	Contribut 2023
Stödafüs da Rina	6.500,00€	Contribut 2023
Aiüt Alpin Mareo	1.000,00€	Contribut 2023

Comune Alfons Facchini y Patrizia Pezzei. Tla sontada dai 19.04.2023 él gnü nominé la davagnadèssa dal concurs **sign.ra Sorá Nadia**, con 83,70 punc sòn 100. Tla sontada dai 27.04. él gnü fat fora da la tó sò a tomp indeterminé, dai 1. de má 2023 ennant.

Con delibera nr. 485/2022 á la Junta scrit fora **en concurs por titui y proes por tó sò en/na funzionar/a technich/ca tla VIII. c. f.**, con contrat a tomp intermedier. Le concurs é gnü davagné dal **sign. Mutschlechner Alex** con 67 punc. L'ater candidat Costa Patrick é roé ete tla gradatöra al 2. post con 66,50 punc. Le sign. Mutschlechner é gnü tut sò con i 1. de má 2023 a tomp indeterminé. Ala pêr ti él gnü reconfermé y reconesciü la indenité dal 18% desco responsabl por le "Ofize technich y lizonzes" y al é gnü reconfermé desco diretur dal "front office" por les pratiches da frabiché y dla contrada, con l'indenité fissada belo con delibera nr. 283/2021.

Con delibera de Junta dai 27.03.2023 él gnü **tut a conescionza che la colaboradèssa con matr. nr. 19 é jüda en pensiun** con i 1. de ma 2023. So ultimo de de sorvisc é sté ai 30 d'aorí.

Tla sontada dai 02.05.2023 á la Junta **azeté les dimisciuns volontares** dal laorante de Comune

con matr. nr. 219. So ultimo de de laur é sté ai 31 de ma.

Al/a colaboradú/dèssa con matricola nra. 303 i él gnü conzedü da fá **na ativité de davagn ocajionala**, fora dal orar de laür, por en davagn preodü de za. 800,00€.

Le sign. Aldo Palermo é gnü tut sò tres contrat de laur ocajional por le sorvisc da aiutant dla verda comunala, por le tomp dai 20 de messé ai 31 d'agost y dai 6 cina ai 31 de dezèmbre 2023. Al i speta en païamont de 12,00€ brutto al'ora.

Por plü cöghes y sorvidèsses de scores y scolines dal comune de Mareo á la Junta mossü ti arlungé de val' dis le contrat de laur, por rajuns liades ai dis lèdi de scora ia por l'ann y ala lista dles presonzes. Ala **sign.ra Ellecosta Teresa d'La Pli** ti él gnü arlungé cina ai 23.06.2023 le contrat desco cöga por la scolina d'La Pli, con orar a tomp parzial (40%). Ala **sign.ra Dejaco Annemarie d'La Pli** ti él gnü arlungé cina ai 23.06.2023 le contrat desco cöga por la scolina d'La Pli, con orar a tomp parzial (60%). Ala **sign.ra Cervelli Alessandra d'Al Plan** ti él gnü arlungé cina ai 22.06.2023 le contrat desco cöga por la scolina d'La Pli, con orar a tomp parzial (89,47%). Ala **sign.ra Kaneider Edith d'Al Plan** ti él gnü arlungé cina ai 22.06.2023 le contrat

da cöga de scolina d'Al Plan con orar a tomp parzial (52,63%). Te düc i caji romagn les desposiziuns anfat desco tles deliberes aproades belo l'ann passé.

Tla sontada dai 23.05.2023 á la Junta **renové l'acordanza dezentrala por i dependonc aministratifs**, co prevèigala la poscibilitè da chirí fora dantan l'isté (dai 19 de jügn fina ai 30 de setèmbre) danter en orar tresfora o en orar partí sò. A vigne moda mèssel gní garantí la daorida dai ofizi le dedemesaledema domisdé.

Tla sontada dai 23.05.2023 á la Junta scrit fora **en concurs publich por tó sò en laorante spezialisé tla IV. c.f.** con contrat a tomp indeterminé y tomp plèn. Le post é rerservé a porsones dal grup de lingaz ladin. Tla sontada dai 05.07.2023 él gnü ametü le **sign. Moling Giuvani** desco candidat su. La comisciun de valütaziun é motüda adöm dala secreteria de Comune dra. Verena Ellecosta y dai colaboradus de Comune Alfons Facchini y Roberto Castlunger.

AMINISTRAZIUN DESPARTIDA BUC

Sontada dai 13.03.2023

- Al é gnü slüt jö en contrat con le sign. David Peslalz, por ti dé en afit les parzeles fondiaries ppdt 3995, 3996, 3997, 3998 y 3999 - dotes

tla P.T. 94/II tal CC de Mareo. Les parzeles é tla localité "Ciastlins" y le contrat vá dai 8 de má 2023 cina ai 11 de novëmber 2027. Le fit é de 800,00 euro al ann.

Sontada dai 20.03.2023

- Al é gnü aproé le cunt consuntif 2022 d'Aministrazion Despartida BUC. Le fond de cassa ai 31.12.2021 ea de 71.266,84€. Ia por l'ann él sté entrades de 117.467,99€ y spëises de 147.522,75€. Le fond de cassa ai 31.12.2022 ea de 41.312,08€. Do i residui atifs y i residui passifs, muntel sô en avanz d'aministrazion de 20.969,40€.

- La firma **ABCERT Srl da Lana** é gnüda enciariada da fá le laur de control y analisa por ti dé ales munts dai Tamersc y de Fodara Vedla la zertificaziun "Bio". Le cost é de 750,00€ plü IVA al ann.

Sontada dai 03.04.2023

- Al é gnü partí sô l'avanz d'aministrazion 2022 y aproé le bilanz de previjun por l'ann finanziair 2023. **L'avanz munta sô a 20.969,40€ y é gnü destiné ensciö:** 13.744,01€ desco contribut straordinar ales vijinanzas (aladô dla proposta dla Uniun dai Paurs); 1.000,00€ por spëises da laoré fora documentaziun tecnica; 6.225,39€ por i parcometri ta Pederü.

- Al é gnü aproé la 1. müdaziun de bilanz 2023, co munta sô a 6.000,00€.

Sontada dai 13.04.2023

- Le **sign. Burchia Siegfried** é gnü enciarié da fá laurs de manutenziun ta Fodara Masarönn y tai Tamersc. Dandadöt nen vára da fá sí. La soma dla enciaria é de 19.215,00€ con IVA lapró.

Sontada dai 02.05.2023

- Al é gnü fat fora da ti vëne **ala sozieté Pederue Sas de Pisching Walter & C.** 40 m² dla pdt 4007/9. Le prisc é gnü fissé sôn 150,00€ al m², porchël 6.000,00€ endöt.

Sontada dai 08.05.2023

- Al é gnü enciarié **deplü dites da sistemé les strades d'azes** ales munts, sce al ess da ester danns dal rio tomp dertan l'isté 2023: la **dita Erlacher Markus d'Al Plan** por Fanes con la soma de 6.000,00€, la

dita Palfrader Artur d'Al Plan por Fojedöra con la soma de 4.000,00€, la **dita Verginer Bau Srl & C. da San Martin** por Senes con 4.000,00€. Les somes é con IVA lapró.

- Al é gnü fat fora da **s'empresté dla firma Abaco Spa** da Padua dui parcometri, por la dörada de 5 agn. L'impëgn de spëisa é por eniann de 10.174,80€, por i cater agn dedô él 7.539,60€ al ann.

- Al é gnü fat fora da **i vëne ala firma Ploner Iwan d'Al Plan** lignan tla Val dai Tamersc por 52,00€ al cubich (fm). Al é dui lóc, le lôt 1 é tai Tamersc, le lôt 2 ta Pederü.

- Al é gnü enciarié la firma **Bauholz Sas da Longiarü** da condü sales da mèter jô sôn les strades de munt. La soma dla enciaria é de 7.200,00€ plü IVA.

Sontada dai 15.05.2023

- Al é gnü paié fora deplü cunc: 166,53€ **al Südtiroler Bauernbund** (sorvisc) y ciamó 181,50€ **al Südtiroler Bauernbund**, desco cuota de comembranza 2023.

Sontada dai 30.05.2023

- Al é gnü dé ia enciaries por laurs de manutenziun sôn les strades d'azes ales munts, por l'isté 2023: **le sign. Paul Huber d'Al Plan** á ciafé l'enciaria por le toch "Lé Picidol - Gran Fanes" por la soma de 9.000,00€; **le sign. Mirko Erlacher**

d'La Pli por Fojedöra por 4.000,00€ y **le sign. Rolando Erlacher d'Al Plan** por le toch "Fodara Vedla - Senes" por 6.000,00€.

- Al é gnü tut sô i famëis por l'isté 2023: **le sign. Paul Huber d'Al Plan** dai 02.06. ai 17.06.2023 desco famëi tla Val dai Tamersc, por en paiamont de 1.143,00€; **le sign. Elmar Wolfsgruber da Kiens** dai 17.06. cina ai 16.09.2023 desco famëi sôn Fodara Vedla, por en paiamont de 1.700,00€ neti al mës plü na soma una tantum de 500,00€ por spëises desvalies.

Sontada dai 05.07.2023

- Al é gnü aproé da ti **paié fora contribuc desvalis a vijinanzas y associazions: 1.500,00€ porom** ala Vijinanza d'La Pli Dessora, ala Vijinanza da Ciaseles, ala Vijinanza da Curt, ala Vijinanza da Longega, ala Vijinanza d'La Pli Dessot, ala Vijinanza d'Al Plan, ala Vijinanza da Val y ala Vijinanza da Mantëna; **1.744,01€** i vá al Consëi dai Paurs de Mareo.

- Al é gnü paié fora cunc desvalis: 159,23€ **al Consorz Agrar da Balsan**; 540,00€ **ala Gaderform Möbel Srl da Longega**; 863,76€ **ala Seve Srl da Badia**.

- Al ti é gnü dé la enciaria **al p.i. Willeit Lois** da arjigné en proiet por tó fora y lascé jô material tla Val dai Tamersc. L'onorar é de 1.575,00€.



Ete Picio Pederü él gnü taié cotan de lignan eniann da d'aisciöda.

Raites nees y raites plü sogüdes

Le Comune laora ennant por abelí y mantigní les plazes dai jüc. Trec laurs án fat dal ann passé encá, ince cole sostèn dla Cooperativa Turistica

La certificaziun "Family Plus" che Mareo á podü pié do l'ann passé n'é nia na rajun da se palsé fora sòn l'aurèr, mo na motivaziun emplü por se dé da fá, cis te chi ciamps co porta pro da fá de nüsc paisc posc da sté saorí. Por families con de pici mituns alda tló sambèn les plazes dai jüc lapró. Al Comune i stál dèr a cör da mantigní les plazes sogüdes y beles, porchèl vègnel ann por ann ince ciaré olache an pó mioré. Le Comune á belo da plü agn enciarié la dita spezializada Graber STP da Porsenú, co fej ann por ann i controis de sügherté dles strotöres y arjigna spo en protocol sòn ci co é da comedé o da baraté fora. Canche ara nen vá de de mëndri laurs, pó le Comune cunté sòn le förtl dai laoranti de Comune;

sce al é da baraté fora raites, vègnel enciarié dites dal mestier. Strotöres nees éel garaté tal ultimo tomp deplü. Enschiö ésera stada sòn la plaza dai jüc d'La Pli, olache al é gnü arjigné na strotöra combinada con raites, sliziadoia y d'atri injins co dèida i mëndri da svilupé la motorica y ince l'ecuiliber. Le medemo é sozedü tal raiun Gran Pré, co é dassènn corsciü tai ultimi agn: ince enló éel sèn na picia plaza assigada ete olache i mëndri pó fá la blèita en compagnia. En gran sostèn ciafa le Comune da pert dla Cooperativa Turistica, co porta pro con sü laoranti da cherié de vigne sort de novités: enschiö á de sü laoranti arjigné cassètes dal saorun nees sides a La Pli co a Rina söla plaza da Runch. I laoranti á spo fistidié da abelí cotan la plaza dai jüc

d'Al Plan tal raiun de Chi Pëscpësc, olache la Cooperativa Turistica á tles mans dōta la manuteziun - söles atres plazes éel le Comune. Pla plaza d'Al Plan éel sèn ince WC a norma por ères, èi y porsones con andicap. Sö Rina aspeta les families jones sambèn ert ala plaza dai jüc dla scolina, olache le Comune á lascé fá en proiet dal arch. Philip Stauder da San Iere (le medemo co á proieté l'urt dla scolina d'Al Plan). Le proiet é belo aproé y prevèiga en investimont de chi 100 mile euro. Al gnará realisé pornanche al é i scioldi a disposiziun. Endertant án lascé puzené endortöra le funz sintetich dla plaza co ea dèr en malester. Cösc dess ester le pröm vare, denanco realisé la plaza enstèssa, che le paisc se iera y se merita.



Plaza con strotöra combinada, arjignada tal raiun dal Gran Pré.



Pla plaza dla scolina da Rina éel gnü puzené le funz sintetich.

Avanz de 1,9 miliuns

Tles ultimes sontades á le Consëi albü da se dé jö con la destinaziun dal avanz d'aministrazion y deplü müdaziuns de bilanz

SONTADA DAI 19.04.2023

Protocol: Le Consëi á aproé le verbal dla sontada dai 8 de forá.

Aministrazion: Le Consëi á aproé la determinaziun dles unités organisatives dal Comune.

Cunc consuntifs stödafüs: Le Consëi á aproé i cunc consuntifs 2022 dai corps de stödafüs d'Al Plan, La Pli y Rina.

Bilanz/1: Le Consëi á confermé döes deliberaziuns de prescia, olache la Junta á aproé müdaziuns de bilanz. Ara nen vá dla delibera nr. 51/2023 che i ciafëis tal ultimo Saltà a plata 13 y dla delibera 70/2023 che i ciafëis te cösc Saltà a plata 8.

Bilanz/2: Le Consëi á aproé na müdaziun al bilanz de previjun por la soma de 594.727,44€. De ci che ara nen vá plü avisa, ciafëise tla tabela vërda.

Cunt consuntif: Le Consëi á aproé le cunt consuntif, cunt economic y patrimonial dal Comune de Mareo por l'ann finanzia 2022. Te cösc documont él lëite de vigne sort de dac enteressanc. Önn de chisc é l'andamont dai debic, che i ciafëis tal articul dlungia. Atló ciamó val' atres curiosités.

- **Personal:** Le Comune á endöt 38 dependontes y dependonc: 15 laora a tomp plën y 12 a tomp parzial (1 en maternité). Tal 2022 á le Comune albü 1.242.042,04€ de cosc por le personal. Le

92,09% dal personal fej pert dal grup linguistich ladin, le 5,02% dal grup talian y le 2,89% dal grup todësch.

- **Valgügn contribuc dla Provinzia por laurs:** Le Comune á podü pié do en contribut provincial de 104.686,88€ por mèter en sügherté la strada da Grones, contribuc provincial de 1.570.843,53€ por danns dal rio tomp, 600.000,00€ de contribut provincial por la strada da Rara, 292.878,44€ de contribut provincial por coleturs dles eghes.
- **Culta turistica:** Dla culta turistica o culta de sojornanza él gnü ete dal 2022 avisa 1.163.205,25€. Chisc scioldi vën trac ete dal Comune mo

APLICAZIUN DAL AVANZ D'AMINISTRAZIUN	SOMA
Laurs de manutenziun pa frabiches publiches	25.000,00€
Plan de svilup comunal	37.000,00€
Contribuc straordinars (Ploania La Pli 13 mile, Copa dal Monn 20 mile, Stödafüs AP 50 mile)	83.000,00€
Emplanc de videocontrol	25.000,00€
Enciaria Griplan por mensa dla scora d'Al Plan (ciara deliberes de Junta)	32.100,00€
Ressanamont Ciasa dal Sport d'Al Plan	100.000,00€
De pici toc de terac por strotöres de Comune	9.000,00€
Enciaria stüde de fatibilité por raiun „Ties“ jö le Gran Pré	3.000,00€
Infraströtöres raiun d'espansciun „Roncac“	20.000,00€
Laurs de drenaja strada Plazores	125.000,00€
Coleturs dles eghes (Framacia y Roncac)	278.494,57€
Condütes dal'ega y canalisaziuns	33.300,00€
Telecameres control dal trafich	30.000,00€
Manutenziun y costruziun de strades y plazes (capitul dles strades)	265.632,95€
Illuminaziun passaji pedonai	30.000,00€
Illuminaziun publica Mantëna y Rina	17.117,23€
Plaza dles scores y urt de scolina - Al Plan	40.000,00€
Laurs Ciamaor, romagnüs do les rogossies dal ann passé	34.064,92€
Comedé danns rio tomp	5.602,04€
Illuminaziun publica (en picio contribut co é gnü adalerch)	648,87€
Sonta dla Crusc Blanca	600.000,00€
Contribuc desvalis Covid	47.620,12€
Fira otica	50.721,50€
TOTAL DAL AVANZ D'AMINISTRAZIUN	1.892.302,20€

MÜDAZIUN AL BILANZ DE PREVIJUN, DELIBERADA DAL CONSÈI TLA SONTADA DAI 19.04.2023

Entrades	Soma	Spëises	Soma
Scioldi retüs por cherta d'identité eletronica	357,70€	Enciaria straordinaria laûrs da puzené	5.000,00€
Contribut y scioldi emplü por refeziun	49.642,30€	Injins por sorvisc da verdascolari	1.000,00€
Contribut statal por i bosc - program „Sic naturai UNESCO por le Clima“	130.000,00€	Bosc, pastöres y munts	130.000,00€
Contribut provincial por operes publiches	375.505,02€	Mascînn por i laoranti de Comune	375.505,02€
Scioldi retüs - raion d'espansciun „Gran Pré“	39.222,42€	Retüda raion d'espansciun „Gran Pré“	39.222,42€
		Retüda cultes paiades sorafora	20.000,00€
		Trasferimont ala Cooperativa Turistica por le personal co tira ete le daz	24.000,00€
ENDÖT	594.727,44€	ENDÖT	594.727,44€

MÜDAZIUN AL BILANZ DE PREVIJUN, DELIBERADA DAL CONSÈI TLA SONTADA DAI 26.07.2023

Entrades	Soma	Spëises	Soma
Maius entrades dala culta IMI	170.000,00€	Capitul strades	65.498,11€
Contribut por maius spëises indenités	11.868,00€	Consulënzes y profescionisc lëdi	22.000,00€
Contribut provincial por la Ciasa dai Pici	16.960,00€	Contribuc desvalis ales uniuns	40.778,00€
Contribut provincial por avaliada de bilanz	55.000,00€	Maius spëises scialdé y strom scores	45.000,00€
Contribut ISTAT por cumpëda dla jont	1.000,00€	Sorvisc de assistonza a ciasa	-9.261,00€
Contribut statal por ativités dai mëndri	4.371,95€	Fond por les ativités dai mëndri	4.371,95€
Contribut provincial por le lingaz ladin	187,11€	Lauris manutenziun scores elementares	20.000,00€
		Capitul por rembursé cultes	30.000,00€
		Sistemaziun entrada palestra Al Plan	5.000,00€
		Patrîs defibriladus	1.500,00€
		Taché ete fira otica stödafüs	1.500,00€
		Stüde de fatibilité laurs plaza sport Rina	8.000,00€
		Urt dla Ciasa dai Pici - Al Plan	25.000,00€
ENDÖT	259.387,06€	ENDÖT	259.387,06€

i vën spo passés ennant ala Cooperativa Turistica.

- **Tarifes:** Por l'Ega da bëre dal Comune él gnü ete 60.500,00€ y al é sté spëises de 61.942,62€. Le sorvisc é gnü corí dai zitadins al 97,67%. Por les eghes pazes él gnü ete 390.302,00€ y al é sté spëises de 359.499,07€. I zitadins á paié ete le 108,57%. La soma emplü gnará avaliada con les tarifes dai agn co vën. Por la desgorta dal ciomont á le Comune albü entrades de 363.938,30€ y spëises por 391.974,32€. Le sorvisc é gnü corí dai zitadins al 92,85%.
- **Straufunghes:** Dal 2022 él gnü fat 665 straufunghes por violaziuns al codesc dla strada. Le Comune á trat ete endöt 27.598,40€. Les straufunghes ea ensiö en media de 41,50€.

Avanz: Le Consèi á aproé

la destinaziun dal avanz d'aministrazion, co munta sö a 1.892.302,20€. Co che al é gnü partí sö, podëise odëi a plata 14.

Urbanistica/1: Müdaziun al plan comun al por le teritore y la contrada a Rina, por i raions d'espansciun "Rina I" y "Rina II" - 1. provedimont 27.02.2023 (Junta), 2. provedimont 19.04.2023 (Consèi)

Sön l'argomont ciäfëise plü enformaziuns a plata 10 desco ince tal ultimo Saltá a plata 12.

Urbanistica/2: Plann de atuaziun sön la pdt 235/5 CC de Mareo - raion A10 "Brach" - 1. provedimont 06.03.2023 (Junta), 2. provedimont 19.04.2023 (Consèi)

Sön domanda dal sign. Franz Agreiter él gnü aproé le plan de atuaziun por le raion, olache al é preodü da fá sö na ciasa nea. Aladô

dles normes d'atuaziun, él conzedü na espansciun dal 10% dla cubatöra esistonta. Chëra é de 6.361,55 m³ y cösc ó dí che la ciasa nea pó gní de 636,16 m³. Le proiet de mascima á ince ciäfé arat positif dal Ofize provincial dai bëns culturali.

SONTADA DAI 26.07.2023

Bilanz/1: Le Consèi á aproé la deliberaziun de prescia dla Junta nr. 193/2023. Ara nen vá de na müdaziun de bilanz, che i ciäfëis sot les deliberaziuns de Junta a plata 9.

Bilanz/2: Al é gnü aproé na müdaziun de bilanz co s'avalieia sön 259.387,06€. Deplü ciäfëise tla tabela dessora. Tal punt dedô él gnü ajorné aladô le DUP - Documont Unich de Programaziun.

Bilanz/3: Le Consèi á traté la garanzia dal ecuiliber de bilanz,



Dartan la sontada dal Consèi de Comune ai 26 de messé, olache ara nen é jüda trep de zifres y de regolamont.

aproenn l'ejaminaziun sön la gestiun 2023. Le revisur dai cunc á dé arat positif.

Regolamont: Al é gnü aproé le regolamont por le videocontrol sön teritore comunel. Tal concret él gnü laoré fora le regolamont co é

belo; cösc definësc les finalités dal videocontrol, regolëia i criters por individué les sperses, al vën tlarí co che i dac vën tratés y registrés, tan dio che les images vën tignides sö y les limitaziuns tl'adoranza dai dac.

Desvalies: L'Ombolt á enformé sön

chestiuns desvalies de atualité:

- **Longega:** Le proiet dla zirconvallaziun da Longega é gnü tut sö tal plan trienal dla Provinzia, ó dí che la realisaziun de cösta opera vën concreta y plü dampró. Tla cornisc dai laurs él ince l'intenziun da arlungé la condüta dal'ega da Rina cina tla fraziun da Longega.
- **Lec turistics:** tal prozes da cumpedé do i lec (Bettennachzählung) él gnü pomez te nosc comune 622 lec nös. Sën gnarál controlé tan ennant che i lec é apost y sce al vën tigní ete i criters. Por döt le comune de Mareo romagnel en contingent de 53 lec.
- **Rio tomp:** Do les gran plöieres de messé án bindebó de problems tal raiun dla ciasa dal lagher a Framacia, olache le bosch de sconanza sorassö á en gran pert mossü gní tut demez o é püre. Al é gnü aledé na gran rota sorassö, con trep terac co s'armer y é en prigo por la frabica dessot. Desco provedimont de prescia, él gnü fat en picio col de proteziun.

I debic dal Comune é tres jüs zoruch

Le Comune á encö 1,76 miliuns de euro de debic. Dan da 8 agn n'él ciamó trëi iadi tanc

Tla sontada dai 19 d'aorí á le Consèi aproé le cunt consuntif 2022. Tla relaziun dal revisur dai cunc ciafun de vigne sort de enformaziuns enteressantes. Öna de cöstes é chëra dai debic. Ala fin dal 2022 á le Comune de Mareo debic por 1.763.270,89€. Sce an ciara al svilup co é sté tai ultimi agn, podunse dí che les aministrazziuns á laoré endortöra, deache i debic é gnüs da ann a ann tres mëndri. Ai 31

de dezëmber dal 2014, á le Comune de Mareo ciamó 6.512.817,51€ de debit. Cin'agn dedò, ala fin dal 2019, n'él belo "mâ plü" 3.081.540,08€ y sën ciamó en iade le mez.

Desche la situaziun é sën, é les aministrazziuns confrontades con de gran aumonc de cosc, cis por les operes publiches. Ponsun al proiet dla Crusc Blancia co é corsciü de passa en miliun y é roé a plü co 2,6 miliuns de euro; ponsun al proiet de

ampliamont dla scora elementara, co dea costé 2,5 miliuns y é gnü dal dopl plü cer. Döt cösc se damana dales aministrazziuns de önn en vers da mëter priorités sön les operes da realisé, de l'ater vers forsc ince da tó sö imprësc por finazié chës operes co vá debojügn. Tal bilanz de previjiun 2023 él p.ej. preodü da tó sö imprësc por mez miliun de euro. L'ultimo iade che le Comune s'á empresté scioldi, é sté dal 2016.

ANN	2014	2015	2016	2017
Scioldi paiës zoruch		539.554,48€	562.572,25€	606.371,15€
Emprësc nös		294.701,75€	294.552,50€	0,00€
Debic 31.12.	6.512.817,51€	5.678.561,28€	4.821.436,53€	4.215.065,38€

2018	2019	2020	2021	2022
631.735,20€	501.790,09€	521.415,03€	391.714,50€	405.139,66€
0,00€	0,00€	0,00€	0,00€	0,00€
3.583.330,18€	3.081.540,08€	2.560.125,05€	2.168.410,55€	1.763.270,89€

MERZ 2023

Ferdigg Luigi	Proietaziun nea y ampliament dla majun sön le lù de Poldele	Rina Str. Costalungia 6
Cooperativa Turistica Al Plan/San Martin	Parch dles ciutes - raiun por atrezatöres coletes costruiziun d'en frabicat de sorvisc y le taché ete ales infrastrotöres publiches	Al Plan Ciamao
Holzbau & KlimaHaus Ferdigg de Ferdigg Florino & Co. Sas	Costruiziun d'en têt por en emplant fotovoltaich sora la zopa dla boacia pal frabicat agricul sön le lù „Pla Dessot“	Rina Pla

AORÍ 2023

Moling Cherubina Ploner Osvaldo Ploner René	Ressanamont energetich con trá jö y fá sò danö le frabicat y costruiziun de plazes da parché pomez ala pröma ciasa	Furcia Str. Furcia 1
Palfrader Rolando	Proiet de restruturaziun dal cuatier tl'alzada dessora pla ciasa d'abitaziun	Al Plan Str. Tlosöra
Mutschlechner Felice	Ampliament y renovamont dla strotöra turistica „La Para“	Al Plan Str. Sarjëi
Hammad Omar, Palfrader Angelo, Palfrader Raimund, Palfrader Rosa, Pedevilla Alfonso	Fá danö le mür „krainer“	Curt Str. Soröa 4
Arnolds Srl	Costruiziun de na cianea y d'en mür sön le confin dal grunt	Al Plan Str. Catarina Lanz 65
Ghedini Valentina Ties Walter	Proietaziun strutrala nea al intern dla cubatöra co é belo metenn adöm döes unités abitatives te öna sora y montaja de coleturs dal sorëdl y emplant fotovoltaich	Al Plan Str. Valiares
Hochwieser Wilhelm	Ampliament dal frabicat agricul	Curt Str. Furcia / Rü

MA 2023

Rifugio Fanes Srl	Costruiziun de logheri en pert sot tera ete rielaboraziun dal proiet	Munt de Fanes
Kaneider Heinz Ties Claudia	Realisaziun de na unité abitativa nea con posc da parché y restruturaziun pla ciasa d'abitaziun	Al Plan Str. Antersí
Erlacher Herbert & R. Srl	Proietaziun strutrala nea con trá jö y fá sò danö la frabica residenziala con costruiziun de garasc	Al Plan, Str. Plan de Coronas 33
Rungger Massimo	Trá jö y fá sò danö con barat de destinaziun	Al Plan Str. Al Plan Dessora

JÜGN 2023

Ferdigg Florino & C. Sas	Costruiziun dai lôc F2 y F3 tal raiun d'espansciun „Rina 2“	Rina Str. Rina
Comun de Mareo	Proiet por la sistemaziun deforaia dal zënter d'La Pli	
Kastlunger Bartolomeo	Ressanamont y ampliament dla ciasa d'abitaziun con trá jö y fá sò danö con ampliament ciac y garasc	La Pli Str. Pliscia 11
Parissos Bettina	Spaché fora y fá döes finestres nees y laurs de manutenziun straordinaria pla ciasa d'abitaziun	Al Plan, Str. Plan de Coronas
Huber Karl	Costruiziun d'en frabicat agricul pal lù da Plazores	Al Plan Str. Plazores

**LES PROSCIMES SONTADES
DLA COMISCIUN DAL FRABICHÉ**

La Comisciun comunala por le teritore y la contrada (GKRL - Gemeindegemeinschaft für Raum und Landschaft) s'abina ai 8 d'agost. **La**

Comisciun comunala por la contrada (GKL - Gemeindegemeinschaft für Landschaft) s'abina en iade al mēns. Les proscimes encuntades é preodüdes ai 12 de setēber, ai 10 d'otober, ai 14 de novēber y ai 12 de dezēber.



Ostis da na vita

Amez jügn á la Uniun dai Ostis onoré 13 ostires y ostis de Mareo, co laora belo da 50 y plü agn tal setur



Onoranza de 50 agn d'ativité por ostires y ostis de Mareo, ai 14 de jügn a Maran. Dmc él Norbert Cristofolini, Hubert Ties, Franz Call, Max Rungger, Patricia Crovato Rungger, Hanspeter Frenner, Alexander Mutschlechner, Max Mutschlechner, Christine Pramstaller y Arthur Mutschlechner. Sön le retrat empara él dmc Helmut Tauber, Judith Rainer, Manfred Pinzger, Arnold Schuler y Luis Durnwalder. (Foto: Ivan Bortondello)

Vigne 5 agn él la Uniun dai Ostis HGV co onoreia ostires y ostis co laora da 50 o plü agn tal setur dla hotelaria y gastronomia. Ai 14 de jügn ésera endô stada tan ennant, con na gran festa tal Kurhaus da Maran. Te cōsta ocasiun él gnü onoré ince 13 ostis de Mareo (nia dūc ne n'ea presēnc): Franz Call dal Almhof Hotel Call, Norbert Cristofolini dal

Hotel Monte Sella, Max Rungger y Patricia Crovato Rungger dal Restorant Tabarel, Hanspeter Frenner dla Ücia Lavarella, Alexander Mutschlechner dla Ücia Graziani, Arthur Mutschlechner dla Ücia de Fodara Vedla, Max Mutschlechner dla Ücia de Fanes, Christine Pramstaller dal Excelsior Dolomites Life Resort, Josef Tamers dal Garni Sayonara, Anna y Hubert

Ties dal Hotel La Bronta y Pire Trebo dal Hotel Majarëi. Les onoranzas é gnüdes sorandades dal presidēt dal HGV Manfred Pinzger, deboriada con l'ex "Landeshauptmann" Luis Durnwalder, l'assessor provincial Arnold Schuler, la sorastanta HGV dal raiun Puster/Val Badia Judith Rainer, l'aconsiadú provincial Helmut Tauber, Hansi Pichler y Gottfried Schgaguler.

IOLAN FORT ANNELIES

Eniann á la colaboradēssa Anneliese Tscholl podü jí tla pensiun miritada. Ara é stada cotan d'agn al sorvisc dal Comune desco cōga y sorvidēssa - i ultimi agn tla scolina d'Al Plan. So tru profesional é jü a piz con la fin d'aorí. Le sorvisc ára desfiré endortōra cina enultima y ensiō á ince maestres, mitans, mituns y Comune orü ti al reconēscē con na picia festa a sorpresa, co é garatada l'ultimo de de laur. Annelies é gnüda cherdada te foyer

con na "vertora" che al ea ciamó en laür da fá ia, mo lajō ti aspetā na partida de mēndri, co á spo orü ti dí iolan a Annelies con na ciancia y en placat de recordanza - arjigné con spontaneité y sonzierité. Ince le Comune á orü i sorandé a Annelies en ciōf, con les mius aodanzas por la pensiun. Cōstes á l'Ombolt enstēs orü ti publicamonter, con cōstes parores: "Stimada Annelies, a ennom dal Comun en gran iolan por dōt ci che t'as fat por nos, por le laur da cōga y le laur da puzenē. Te vas sēn en pensiun y porchēl t'aodi dōt le bun, i t'aodi che te ái tomp por te, bona fortuna y sanité. Gōdetla."



L'assessor Ludvig Rindler con Annelies Tscholl.

Na partida de verdascolari

Sön iniziativa de Olga Pedevilla, ésera garatada da mëter adöm en grup motivé co verda i scolari söle tru da jí y gní da scora



Gragh y pici sön tru da scora. I verdascolari é stés enló da vigne tomp.

Agn alalungia ánse t'Al Plan albü porsones co s'á motü a desposiziun da fá le verdascolari, tan co da ester de por de sön burces dal paisc, por ti empormëter ai scolari da jí a scora y passé ia la strada con plü sügherté. I ponsun al sorvisc fat da Silvester Peslalz dal För (+) y cotan d'agn da Erwin Kosta. Tal ultimo tomp n'él dio plü sté degügn. Le Comune á proé da chirí porsones tres publicaziuns sön Le Saltà y la plata de Ploania, mo ara n'é nia garatada. Tla cornisc dal proiet "Family Plus", olache ince la popolaziun é enviada da dé so contribut, él sté Olga Pedevilla co s'á tut a cör la cossa y s'á trat ete les magnes. "Damperfora m'ái fat na lista de porsones ch'i ponsá co ess magari podü avëi dlaorela y spo sunse propio jüda da ciasa a ciasa a damané", cunta Olga. Encö podunse dí che al á paié la mëia. Ara á abiné adöm en grup de 11 porsones, co s'á motü a desposiziun da fá cösc sorvisc de valüta - geniturs, neni, porsones en pensiun. **Do alfabet dal cognom él lergele Call, Fabian Castlunger, Manuela Comploi, Georg Cristofolini, Stachio**

Erlacher, Hartmann Frontull, Hubert Frontull, Marco Gabrielli, Peter Mölgg, Albert Moling y Walter Weiss.

Damperfora él gnü fat zacotan de encuntades por s'organisé, splighé co che al é da se comporté y ci che al é da tigní cunt. Do les vacanzas da Pasca ésera stada tan ennant che an á podü pié ia y cina ala fin dal ann de scora á i verdascolari fat sorvisc tla burcia danter Sole y Teresa, tla burcia sora le Ama Stay y tla strada Plazores. Ai ea presënc dan scora dales 7:30 ales 8:00 y do scora dales 14:00 ales 14:30 - de por de y da vigne tomp. Ciafé plü porsones co se partësc sö é stada la dërta rezëta, desche Olga cunta: "Sce na persona mëss se tó sö l'impëgn por döt l'ann de scora, cuaji 9 mëssc y vigne de da doman y domisdé, él plü rio da ciafé zacai. Sce an se partësc sö aladô che la jont á tomp, vára endere plü saorí." Enschiö él vigne verdascolari co podea se chirí fora sce fá önn en iade al'edema, o a rotaziun en n'edema entiera. Le program gnea mené fora edema por edema. Olga é encontonta che döt á funzioné bun y che al é nasciü gran

ligrëza y spirit de grup: "Düc dëida y vëiga ince che so sorvisc é por val'. Belo söa presonza sön strada fej fazion. La jont mët plü averda, ai se recorda dles regoles, ciafërs vá plü plan y en bel aspet é che gragn y pici se salüda."

L'ann de scora é gnü slüt jö con na cëna deboriada, co é gnüda ofrida dala Cooperativa Turistica. Ala pert él ince le direttur Carlo Runggaldier y l'Ombolt Felix Ploner: "L'Ombolt y ince l'assessur Ludwig Rindler á dagnora mostré partezipaziun y desponibilité. La presonza dal Ombolt é stada en bel sëgno de recondescionza", dij Olga.

Por le "paiamont" dal sorvisc, s'ára motü sön tru a chirí "sponsors", olache ara á encunté na magna leria da pert de ostis, boteghiers y porsones privates, co á motü a desposiziun bonns de vigne sort: "Ai ciafa bindicé en bonn por en café o val' da bëre, da jí a se mangé le dlacin con la familia, cinamai por jí dal friser. I á encunté gran desponibilité", dij Olga con sodesfaziun. Chisc pröms mëssc é en iade stés na proa. Belo sën ésun endere tal laur da arjigné y organisé le program de sorvisc por l'ann de scora co vën. Y por enló él - desche al pö - ciamó porsones lapró co dëida empara. Le proiet dai verdascolari é en bel ejompl de comunité y de colaboraziun, mo ince na desmostraziun che ala fin sunse düc canc nos "Comune". Y sce i dun nosc contribut tla maniera ch'i sciafiun, vára da fá de beles cosses.



Pla cëna de iolan. Dmc le verdascolari lergele Call, Carlo Runggaldier dla CT, l'Ombolt Felix Ploner y Olga Pedevilla.

Löm söles strisciores

Plü sügherté por les porsones co passa ia la strada. Le Comune á lascé fá en proiet por l'illuminaziun.



Ejempl de lominara con stangia co passa sora strada ca.

Tla sontada dai 2 de má, á la Junta enciarié la firma **Datatraffic Srl da Eppan** da condü y mëter sö l'illuminaziun sora deplü passaji pedonai, por fá ensciö en vare emplü por la sügherté de nosta jont, canche ara passa ia la strada da scür. Entant án impegné la soma de 31.716,67€ plü IVA, co empormët da fá i pröms vari de cösc vers. Y atló gnarál damperfora motü sö l'illuminaziun sön les strades plü traficades d'Al Plan, olache al é dantadöt la strada provinciala dal Monte Sella cina sö d'La Bronta y spo le passaje pedonal dan Ciasa

dal Parch. Plü ennant odarán sce y olá che al vá debojügn da iluminé passaji pedonai te païsc. Aladö dal post, gnarál adoté soluziuns desvalies. Sora valgügn passaji pedonai gnarál modü stanges co stá sora strada ca con la löm lassora, te d'atri caji gnarál motü la lominara dles perts. An spera ensciö da dé en contribut por les strades plü sogüdes, ci co ne sostituësc endere nia la responsabilité de vignönn de nos, da mëter averda canche an passa ia la strada, y desco ciafers da tigní velocitës mosörades y en edl sön porsones co podess passé ca.



Ejempl con löms dles perts, co iluminëia les strisciores de dui versc.

FALZADES DA CORÚ



Le raiun dles scores d'Al Plan é plü da corú, do che scolari y jonëza á fistidié da abelí la falzada dla biblioteca y le mür pomez al salf dal Zënter Families Mareo y salf dai Jogn. Motü man án l'ann passé, canche le Comune á chirí la colaboraziun con la scora mesana y le Sorvisc ai Jogn Val Badia. Cis le mür de biblioteca ea bindebó öt. L'ann passé da d'altonn é sté i scolari de 2. y 3. mesana co á tut corusc y penel tla man. Sot la soravijiun dal professor de ért y imaja Alfred Tavella d'La Val, ái depont sö la falzada, con coertli de libri sön argomonc desvalis: liondes, stories, cunties, scionza, tecnologia, ez. La pert sorassö é gnüda aledé eniann da d'aisciöda, canche scolari á tut de pici panei de petun y i á trasformés te libri, co é spo gnüs embruncés söla falzada. Cösc con l'aiüt dal moler Georg Erlacher dal Ciapolère, co á ince empresté ca le gherist y fat sö la scritta. Le Comune á sorantut i cosc por corusc y materiali. Le mür pomez ai salfs dal jogn y dles families é belo gnü abelí l'ann passé. Ince tló ti á le grisc lascé lerch a motifs y blasuns da corú, ci co é garaté por man dla jonëza co á tut pert d'isté a en curs de graffiti. Ligrëza mostra l'assessor ala scora Ludwig Rindler, co vëiga en bun ejempl de colaboraziun danter Comune, Scora y Sorvisc ai Jogn.



Le mür abelí dala jonëza pomez a so salf y chël dles families.

Anvidalfarei y Gustl

I ces de brom dal artist Lois Anvidalfarei rōa ince sora i confins fora. Ōna dles porsones co fej da model é Gustl Kaneider d'Al Plan



Tla dlijia da Dala ai prōms de messé. A man ciampa Gustl d'Andram con l'artist Lois Anvidalfarei, le ploan da Dala Jakob Patsch y le vësko da Desproch Hermann Glettler.

Ai 2 de messé él sté fora Dala (Hall in Tirol) na mëssa solëna por comemoré p. Franz Reinisch, en preo co á refodé da i dé joramont a Adolf Hitler y l'á porchël paiada con sōa vita. Al ti é gnū taié ia le ce, che al ā ma 39 agn. Por l'ocaijun él gnū motū fora amez dlijia en gran ce de brom fat dal artist de Badia Lois Anvidalfarei (87x105x103 cm, 210 chili). Na scoltōra co simbolisēia la borta fin de p. Reinisch, mo co ó ince recordé dōtes les porsones co á paié y paia dōtaorela con sōa vita na dezijiun de coscionza, da sté ete por la iustizia.

Forsc él pūc co ša che la scoltōra á en pert ince da fá con Mareo. Sce an ti ciara avisa, n'él nia da soraodēi la somēia dal ce con chël de Gustl Kaneider d'Andram, co fej belo da chi 20 agn encá model por i cés de Lois Anvidalfarei. Cōsta esperionza á motū man por cajo,

desche al cunta: "Dal 2000 sunse roé sōn Badia por laur. Cōsc m'á porté danter l'ater ince la pasciun por l'ert. Do da en pez ti á fat na proposta a Lois Anvidalfarei, che i ā emparé da conēsce tres le laur. I ess orū en so cader con me lassora. Sōa resposta é stada che sce i foss jū sō en valgūgn iadi, m'al essel scinché. I n'á nia bazilé. Da enló encá vái tres endō sō Ciaminades, canche al mo damana." La colaboraziun é jūda ennant dūc chisc agn, olache Gustl vá tres endō sō dal atelier de Anvidalfarei a se mēter sō dantan che l'artist stūdia sū ces. Gustl cunta ennant: "I vá dagnora sō dantan la palsa da misdé. Enló él spo da sté chic plū o manco en n'ora tla posiziun co é gnūda chirida fora dal artist, sambēn con val' pases danterete. Al n'é nia tan saorí desche trec podess miné, mo al mo sá dēr enteressant. I vëighi desche na te' opera d'ert nasc,

FOSTÜS DE EN ANN

Dai prōms de messé ennant ciafun da s'empresté fora tla biblioteca "Angelo Trebo" d'Al Plan la Cronica dal Comune de Mareo 2022, co rōa eniann sōn le bel numer de feter 400 plates. Lēite pón lí do dūc i avenimonc prinzipai y sambēn ince cotan de curiosités, sōn ci co é sté y ci co é sozedū tai trēi paisc de nosc comune dantan l'ann passé: movimont demografich, laur dl'aministrazion publica, les corētes dal tomp, manifestaziuns, vita de dlijia y dles uniuns, avenimonc fora dla vita dal sport... Dōt cant vën acompagné da en grōm de retrac, co fej la publicaziun no ma enteressanta da lí, mo ince da ciaré. Te biblioteca pón ince s'empresté fora les Croniches dal 2006 encá, y se fá enstēsc demorvēia tan trep co s'á mūdē te chisc agn. Bona letōra.



La Cronica dal Comune de Mareo pón s'empresté fora te biblioteca d'Al Plan.

le ponsier o la idea co stá doía, le tru che ara fej dal dessēn cina che ara vën corada y e.e. Enteressanc mo sá ince i ponsiers che i pó mo fá te chi momonc de chît, ponsenn magari al destin de chē porsona co gnará recordada con chē opera d'ert."

Cina sēn á Anvidalfarei fat 7 cés sōn le model de Gustl. "Le plū brao sunse sambēn con chi co é gnūs motūs fora publicamonter", dijel. Le prēm é da odēi a Viena sōn le Friedrich-Gulda-Platz, en ater ce dal titul "Mediterraneo" é tal museo de Zott a Unterammergau y spo cōsc dediché a p. Reinisch: al sará da odēi cina d'otober tla dlijia da Dala, roará spo te plū posc olache Reinisch á operé, por ciafé ala fin so post sōla plaza de dlijia da Dala, intitolada a d'ël.

Dé dal Ambiont

Iolan ales 175 porsones co é gnüdes a daidé



Ince eniann él roé adöm na bela cumpèda de sac fosc plëns de ciomont. Ince i Stödañüs dai trëi païsc á daidé da l'abiné y le desgorje.

Ince eniann á le Comitê Comunal dla Jonëza motü a jí le Dé dal Ambiont, organisé deboriada con le Comune, i Stödañüs dai trëi païsc, i grups dai jogh y la Cooperativa Turistica. La sabeda ai 22 d'aorí s'á encër 175 porsones motü sön tru a Al Plan, La Pli y Rina por jí a chëie sô ciomont y refodam che jont lascia por encërch, gonot zonza ponsé. Coi agn é la situaziun gnüda cotan miú, ince deache al é tres plü poscibilitëts da despartí y desgorjé ciomont debann. Le zënter de reziclaje ch'i án tló te Mareo é sogü en boniscimo ejompl de cösc vers. Atramonter n'él tres ciamó de chi che al ti an é anfat da sciüré ciomont ia por tera o da finestra d'auto fora. Cösc á odü ince eniann chi voluntars co é jüs a romené sô dlungia les strades pomez ai rüs. Na gran groaria é tres ciamó i cionc de fazorí de papier co arsësc dlungia strada y cis dô lëns y brüsces. Y les ciches de zigarec, co vën sciürades ia por tera „desch'al foss la cossa plü normala dal monn“. Nia mancé ne n'á papiers y angostares de plastica, nylons, bossi y cartuns, val' chibbli de plastica y de fer, montli y foracia de vigne sort. Les voluntares y i voluntars co á tut pert, á da misdé ciafé val' da marëna y a d'ëi ti vál le iolan che ai s'á tut dlaorela y á fistidié da delibré

nüsc païsc y nosta natöra da n gröm de sac de refodam. L'envit a duc canc nos é sambën chël da ester ennant lezitonc da despartí y condü le ciomont tal zënter de reziclaje o le sciüré tai chibbli olache al toca. Le miú ciomont é dagnora chël che an ne fej nia y che an n'á nia bria da chëie sô.



Marëna miritada dô l'impëgn.

I CARTUNS SÖI GRATUNS



Pal zënter de reziclaje ta Ciamaoor pón dé jö de vigne sort de refodam y al é bun che trepa jont anüza le sorvisc. Vigne iade röel ince ete porsones con gratuns (carelli) plëns de cartun, mo baldi sozedel tres endô che cartun lëde vá a perde sön tru. Y deache al n'é feter degügn co s'ai chëii sô zoruch, él gonot i laoranti de Comune co mëss jí dô strada a romené sô. Cösc ne messass nia ester sce le cartun gness belo atira trasporté endortöra. Ideal fossel da corí jö le cartun söi gratuns, con na rëi o con na tënda, por che al stess spo ince. Le Comune præia y rengrazia belo damperfora por la sensibilité, le respet y la colaboraziun.



Cartun nia taché jö söi gratuns vá ienn y gonot a perde sön tru.

REFODAM CO NE TOCA NIA

Pal punt de racoiüda dal ciomont a Rina él tres plü gonot gnü sciüré refodam co ne toca nia: nylons, plates de ghips, ciomont de ciasa, resc de mangiaria... Le Comune præia bel la jont da colaboré y dé jö ma ci che an pó. Dôt l'ater refodam pón scialdi dé jö debann tal zënter de reziclaje da Ciamaoor. Sce duc dëida, vára plü saorí da podëi garantí ennant le sorvisc ince tal dagní.

Döt le bun mëda Nane

Nane Ferdigg da Rina á complí le secul de vita



Mëda Nane Ferdigg con la torte dai 100 agn, che ara á complí ai 27 de messé.

En jöbia ai 27 de messé él sté gran rajun da fá festa a Rina, olache mëda Nane Ferdigg vèd. Flatscher á complí la bela eté de 100 agn. Al n'á nia mancè en ciöf y na torte da festa. Val' deplü sön söa vita cialfunse tal liber "Recordanzas - patachi cöjë la uma vigne dé - jont da Rina la cunta", motü adöm sot la coordinaziun de Walter Sottas da Pecëi y dé fora dal 2013.

"Nane é nasciüda a Rina (co ea laota ciamó Comune) ai 27 de messé 1923 y é corsciüda sö tla vedla ciasa dl Mone. So pere, Carlo Ferdigg de Poldele, á cialfé laur da mone y laorà ete la grüzena dla mognaria. Söa oma, Lena Craffonara de loche, ea ciasarina y á motü al monn na bela schira de mituns: Maria, Veghile, Angela, Angele, Flavia, Florino (mort belo da picio), Rosalia, Nazio, Veneranda, Nane, Lois y Florino. La jona Nane é roada pa deplü paurs a fá la fancela, plü agn ince pa so fre Florino. Por se davagné val' pomez, fajëra la refeziun por i scolaris dla scora dal paisc. D'otober dal 1958 ára maridé Pire Flatscher y é roada ete tla vedla ciasa dl Moradú, tla vila da Val. Danter le 1959 y le 1963 gnél spo i 3 mituns a porté vita tl matrimone: Adelheid, Martin y Serafin."

Tal liber él scrit ennant che Nane á dagnora la bona löna y é bënodüda da pici y gragn. Desche i podun odëi ince sön i retrac te cösc Saltá, ára tres ciamó so rí söla bocia. Ince a ennom dl'Aministrazziun i vál les mius aodanzas por le compliagn toronn. Che ara pói avëi ennant la sanité y se gode ciamó de bi momonc tal cërtl de sü familiars. Döt le bun.

FRÜHE HILFEN: AL VÈN CHIRÍ AIÜT VOLONTAR



Frühe Hilfen é en proiet de sostën por mames, peri y sü mituns da 0 a 3 agn. Canche al nasc en möt, él en gran avenimont plën de ligrëza. Endere: belo dertan che la ëra aspeta, dessera podëi sté t'en ambiont co dá sügherté y proteziun, Soradöt i pröms trëi agn de vita dal viadú é dër emportanc. Dlungia la gran ligrëza, él ince trepes mames y geniturs frësc co á de vigne sort de dübi y crüzi. Le tomp dan la nasciüda y i pröms agn de vita dai mituns comporta trec cambiamonc,

desfides y novités. Le team „Frühe Hilfen Bruneck“, ti stá dlungia a ëres co aspeta y a families jones, a na moda che le mëter man dla vita de so viadú pói garaté plü saorí. Por renforzé le team vëgnel chirí infermieres/infermiers pediatriches/cs (ev. en ponsiun) co dëidi les families sön basa volontara y ti pïti so aiüt profesional. Chi o chëres co foss a desposiziun, pó contaté y s'enformé **ala mail bildung@familienverband.it o ai numeri 0471 974778 o 333 6203945.**

DE VIGNE SORT

DOTURIA FEBBRARO

Chisc é i orars dla doturia Stefania Febbraro, tel. 377 3288595

Al Plan: Lönesc 9:30 - 12:00 y 18:00 - 19:30 (da sêra sôn prenotaziun); Dedolönesc 11:00 - 14:00; Jöbia 13:00 - 16:30 (sôn apuntamont, con prezedonza ai paziënc da Rina); Vëndres 9:00 - 12:30

La Pli: Dedemesaledema 9:30 - 13:30

DOTUR AGREITER

Chisc é i orars dal dotur Eduard Agreiter, tel. 333 1380852

Al Plan: Dedolönesc 7:30 - 8:30; Jöbia 13:15 - 14:30

Rina: Lönesc 12:30 - 13:15

DOTURIA MATTIONI

Chisc é i orars dla doturia Lodovica Mattioni, tel. 328 8590842

Al Plan: Dedolönesc 10:30 - 13:00 y 14:30 - 16:00; Jöbia 10:30 - 13:00.

CHIBLI DLES LAADÖRES

I **chibli dles laadöres** vën ciamó laés fora ai 11, 18 y 25 d'agost, ai 1. y ai 15 de setëmbër. Al é dagnora de vëndres, canche ai vën jütës.

ERI Y GRASC

La firma Dabringer Srl da Feldthurns vën a chëie adöm eri y grasc de hotí y restoranc, le **vëndres ai 22 de setëmbër 2023**. Sce eserzizi ess da avëi debojügn de na jütada sorapró, pón contaté la dita al nr. 0472 979700 o ala mail info@dabringer.it

L'EGA DAI IDRANC

Tres endô sozedera che jont taca ete rôs pai idranc publics por debojügn privac y zonza damané o lascé alessëi. Che al sidi por sprinzé jö plazes o laé mascinnns, firmes co taca ete por sü debojügnns, cina l'ega da frabiché. Al vën recordé che i idranc á la funziun primara por la proteziun zivila. Sambën ô l'Aministraziun ti jí adencuntra ala jont; al é endere emportant che al vëgni damané danfora, ince por evité sotissora o danns co ne mëss nia ester. Por i païsc d'La Pli, da Rina y le raiun artejanel „Ciamao“ é da damané le Comune; por le païsc d'Al Plan le Consorzi dal'Ega. Präibel y iolan de osta colaboraziun.

LA PORSONA Y I MEDIA

La familia é pa marëna y düc baia danter ëi. Al é na atmosfera da sté saori. Engalin é le pere co scuta. Canche i atri s'anadá, ti ciarai y ci fejel pa? Al ciara sôn le smartphone. Al mëss ciaré les previjuns dal tomp, dijel. O ciamó na situaziun: na copia vá a cëna t'en restorant, ai se sonta jö pa mësa. Encô á finalmonter en pü' de tomp por ëi, deache la lâ ciara dai mituns. Ai comana le mangé y ci fejai pa dedô? Entrami tol ca le smartphone y mët man da sferié lassora!

„Resta porsona tal monn dai media“ á ennom na campagna de sensibilisaziun organisada dal Comité de Raiun Val Badia y dal Sorvisc ai Jogn Val Badia, por sensibilisé sôn l'adoranza, o plütere la maladoranza dal smartphone y dai mass media. Chisc mesi é tres presënc tla vita da vigne dé: pai pasé, canche an se bër val' con zacai, dardan che an arvënn l'auto, canche an aspeta le bus, canche an

vá a spazier, canche an se stüfa.... Te cösta campagna nen vára dandadöt dai gragn y dal comportamont che ëi á con chisc media. An ó envié da i adoré con responsabilité y mosöra, ponsenn che i gragn á le compit da ester de bun ejompl por i jogn, por i mituns. I gragn baudia gonot che „chisc jogn é tres sölë telefonn“ y ne s'anadá nia tan gonot y tan dio che ëi enstësc l'adora. An dess ince ponsé sora sce le telefonn n'é nia val' iade en meso por emplí en öt che an á daete, o sce al dess fá da möta da mituns, o sce al dess nes dé la sensaziun da palsé. Gonot é proprio ince tres i mass media ch'i podun dé en n'atra parüda de nos enstësc. Dô na serada de prejentaziun y discusciun stada de má sö La Ila, vën la sensibilisaziun fata sôn de gran placac con messaji y retrac stersc. Chisc é tachës fora por i comuni dla Val Badia cina ai 9 d'otober. Te Mareo ésaí söla falzada de ciasa de Comune.



Önn dai gragn placac tachës fora sôn Ciasa de Comune.



Impressum: „Le Saltà“ - Plata d'enformaziun dal Comun de Mareo
- Editur: Comun de Mareo / Ombolt Felix Ploner - Vën fora trëi iadi al ann - **Diretur responsabl:** Iaco Rigo. **Redaziun y Layout:** Pablo Palfrader. Registrada pal Tribunal da Balsan nr. 24/2011.
Stamparia: Tezzele by Esperia Srl, 39100 - Balsan. **Misciun:** Ciasa de Comun, str. Catarina Lanz 48, 39030 Al Plan de Mareo (BZ), tel. 0474/501023, fax 0474/501644, e-mail: info@comun.mareo.bz.it.
mareo.bz.it - **Internet:** www.comun.mareo.bz.it.

